

**Jean-Marc COURBET**  
**Felibre Majourau**

**Laus de PÈIRE MILLET**  
**(1913- 1998)**

**Cigalo de Zani**

1876  
Théodore AUBANEL  
(1829-1886)

1887  
Louis ASTRUC  
(1857-1904)

1904  
Jules RONJAT  
(1864-1925)

1925  
Fernand CLÉMENT  
(1877-1957)

1958  
Pierre MILLET  
(1913-1998)

**Souveni, souveni...!**

Pèire Millet l'ai d'abord couneigu au licèu d'Aurenjo. L'ai agu coume proufessour en 1958-59. Venié d'èstre nouma Majourau, quand parlas de l'asard! Quand pense qu'aquel an d'aqui, ié falié faire lou laus de soun davancié!

L'ai just un pau agu coume proufessour d'istrucioun civico. Mai pulèu que de nous aprene li reglamen de la Republico amavo miéus nous legi Mirèio o Les contes du chat perché. Èi belèu pèr acò que me sènte gaire d'afecioun pèr l'estat que nous gouverno!

Me souvène d'èu, quasimen sèmpre vesti d'uno canadiano griso e couifa d'un berret, sèmpre emé soun Solex, quasimen legendàri, qu'estremavo dins sa salo de classo.

Pèr lis escoulan, passavo pèr un ouriginau. Mai o mens sabian qu'èro pouèto e qu'escrivé en prouvençau. Souvènti fes, s'arrestavo dins soun cous, marmoutejavo quàuqui mot, de cop que i'a noutavo quaucarèn. Tóuti coumprenien que l'inspiracioun lou vesitavo. Generalamen sis escoulan se truffavon un pau d'èu, pèr escàfi l'avien subrenouma *Pierrot le dur*. Mai darrié aquèsti truffarié de faciado, i'avié uno amiracioun prefoundo pèr soun inmènso culturo. Èro d'aquesto generacioun que legissié encaro naturalamen lou latin emai lou grè dins lou tète.

Disièu tout escas que Pèire Millet tiravo racino de Cadarouso, proche d'Aurenjo, en ribo de Rose, aqui ounte fara mirando Lou Tiatre dóu bastardèu, de soun ami Pau Marquion.

Ero di Millet tant dóu coustat de soun paire que de sa maire, que si gènt èron cousin german. Un de sis aujòu, lou grand de soun grand, un Millet, avié croumpa i raro de Cadarouso e d'Aurenjo, au quartié de Gabet, entre Rose e Egue, un terren ounte èron estado ensepelido dins la caus vivo li 332 vitimo de la Coumessioun Poupulàri d'Aurenjo en 1794. Aqui avié fa basti pèr lou souveni uno capello qu'eisisto toujour. Ei devengudo rode de roumavage estènt que demié li vitimo èron 32 religiooso, pèr la maje part ouriginàri de Bouleno, còu-trencado pèr lou rasour naciounau francés qu'avié prouclama la Liberta, l'Egalita e la Fraternita.